

E 'l pes, ch'a v' menno
 Peui ancora le man,
 Basta ch' i fasse quaich pcita sgarà;
 Son d' gonzo, son d' babi,
 Son d' trubi, son d' coco,
 Son d' gnero;
 Gara, s' i fè cousta folairà.

Il Marito si lagna della Moglie.

Risposta all'antecedente sull'aria stessa.

CANZONE IV.

Che cagninna, che disperassion!
 Sì sì, dime pura,
 Ch' i son un tavan,
 Senza ch' i giura
 Le gent a cherdran,
 Oh che folia!
 Chi sa s' i durmia
 O s' i revava,
 O cosa i m' toirava
 Disend coul gran si:
 J' eu pr desgrassia
 Pià un fidecomis,
 Ch' a l' ha nè grassia,
 Nè deuit, nè d' ardis;
 Ma le manere d' un cabassinas,
 L' è scrosa, bavosa, nojosa,
 Svergnosa, una tiorba:
 Sì ch' i l' eu pialo 'l bel bagagias.

M'era vis ch' l formag piasentin

A m'era tombame

Giust sui macaron;

Ma i son trovame

Gabà pr da bon:

Peussa tacheje

La bsest e rableje

Coula canaja

Ch' m' an dame la baja.

Fasandme i conchè;

Con rusa drola

M' an mname là d' neuit,

E mi badola

Son d' long restà cheuit;

Squadrand ant la cera coul brut sumias.

L'è scrosa, ecc.

A m' piasia coul bel stomi arlevà,

E pur s'è mai dasse

Pi furb nissun cioc;

S' erla pa fasse

Le pupe con d' bioc?

An despojandse,

E peui an cogiandse,

Lì ch' i buchere,

Lì sì ch' i restere

Tut marávios;

Peui s'è gavasse

I dent tuti postis

Da le ganasse,

E i brin dal cupis;

Sì ch' i son trovame ant un bel ambaras.

L'è scrosa, ecc.

Für dco coula dota e fardel,

Ch' a m' dero ad intende,

Fasandme un eclat,

Ch' a m' fer arende

Pr fè coust contrat ;
 Pr mi cherdia
 Second ch'a s' disia
 Pr roba vera
 Ch'a fuss reditera
 D'un bon bocon gras ;
 Dop 'l mariagi ,
 Chi l'avria cherdù ,
 Che coust potagi
 Aveiss gnanca avù
 Lo ch'a podria valeje un spuas.
 L'è scrosa , ecc.

Ma da già ch'a l'è povra com' Giob ,
 Almanch a patieissa
 Nen tant 'l fumat ,
 E ch'a l'auseissa
 Nen tant 'l cacat ;
 Ela pa drola ,
 Gnanch mesa parola
 Mi peus nen dila ,
 Ch'a veul nen sufrila ,
 S' ij treuvo da di ?
 A veul ch' i passa
 Li pr 'l pertus ,
 E ch' i la lassa
 Fè tut a l'arbus ,
 Mi la faria mangè dai crovas.
 L'è scrosa , ecc.

Pur manch mal s'a l'aveissa del deuit
 Sta bruta catorba
 Con coul mostas piat ,
 Ma l'è una sorba
 An tuti i seu trat ,
 Mach a buchela
 Son cose d'campela
 Giù dla bialera ,

O con na sivera
 Su quaich liamè.
 A l'ha una testa
 Da piantè d'passon,
 L'è pronta e lesta
 Al par d'un canon:
 O quante rabie con coul buatas!
 L'è scrosa, ecc.

A fa rie sentila cantè
 Con coula bochina
 Da fene un fornèl,
 E la vosina
 Da spaciafornèl,
 Quante grimasse
 Ch'a fa con d'smorfiasse
 Con coul brut muso
 Tavota pien d'ruso,
 E tant mal forgià!
 Pure sta plandra
 S'figura d'cantè
 Com'na calandra
 Fasandse sauté
 Coul mantonat fait a forma d'cajnas.
 L'è scrosa, ecc.

Minca poch va ciamandme d'ij dne
 O pr d'ampodrura,
 D'essensa o d'rossat,
 Pr fè figura
 Con desse so blat;
 Ela curiosa,
 Che cousta morflosa
 Veuja tiflesse,
 E veuja butesse
 Peui ancora su 'l fus?
 I son pr feje
 Portè d'sira d'gran

Pr ambrlifeje
 Coul moro da can:
 Chi l'ha mai vist un pi bel umoras;
 L'è scrosa, ecc.

Si saveisse, ch'an tuti j'afè

Sta bruta borica
 Sa nen desse pas
 Salvand ch'a fica
 Pr tut 'l so nas,
 Che controloira,
 Che brava dotoira,
 Fè la prudenta,
 La dota e sapienta,
 Sta tèsta d'olouch:
 Chila cherdendse
 Parlè d'avocat
 Spua d'sentense,
 D'rason da savat,
 Ch'a meritria fiacheje 'l mostas.
 L'è scrosa, ecc.

Lo ch'a l'è ch'a la guasta d'autut,

L'è coula servlassa
 Così sgangarà,
 Così durgnassa,
 E tant pignatrà,
 Con che passiensa,
 Con che continensa
 Venta ch'i passa
 Con coula mulassa
 Continuament!
 S'i veui arprende
 La soa opinion,
 A veul pa intende
 Nessune rason,
 Salvo ch'i m'buta pisteje 'l testas.
 L'è scrosa, ecc.

Una cosa ch' i peus nen sufri

Da cousta gavota,
Ch' ant ogni stagion

A sta tavota

Cougià su 'l tisson;

Oh! che figura

Fa coula freidura

Con coula plissa,

Con coula manissa

Del peil arami,

Mi la fichria

Pr rabia ant un forn,

E j' atachria

Feu drint e d' antorn

Pr libereme da coul trombonas.

L' è scrosa, ecc.

Voi ch' i veule carieve d' bosch vard,

Vouli ch' i v' la dia

Tut fora d' i dent?

L' è una folia

Ch' i fè, povra gent,

Fumele e teila

Dal ciais d' la candeila

L' è difissiosa

La cosa e scabrosa

Podeila andvinè ;

Andeje adasi,

Prché an conclusion

Mi sento squasi

Pr tut sta rason,

Ch' a l' è 'n sproposit butesse coust las.

Son scrose, bavose,

Nojose, svergnose,

Son d' tiorbe,

Lasseje ste cousti brut bagagias.